



Broj: 671/19
Sarajevo 21.11.2019. godine

Saopštenje za građane Kantona Sarajevo

Sindikat radnika u zdravstvu u Kantonu Sarajevo je udruženje koje zastupa prava i interese svoga članstva, a koje čine nemedicinari osnovnog, srednjeg, višeg i visokog obrazovanja, te medicinari srednjeg, višeg i visokog obrazovanja, kao i specijalisti i subspecijalisti medicinskog i nemedicinskog usmjerjenja, dakle sve kategorije uposlenika u zdravstvu u Kantonu Sarajevo.

U ovom trenutku, od tri sindikata koji egzistiraju u Kantonu Sarajevo: Sindikat radnika u zdravstvu u Kantonu Sarajevo, Sindikat doktora medicine i stomatologije Kantona Sarajevo i Sindikat KCUS, jedino je Sindikat radnika u zdravstvu u Kantonu Sarajevo reprezentativan na području Kantona Sarajevo, te jedini može sa Vladom Kantona Sarajevo pregovarati vezano za novi Granski kolektivni ugovor o pravima i obavezama poslodavaca i radnika u oblasti zdravstva za područje Kantona Sarajevo (u daljem tekstu: Granski kolektivni ugovor). Slijedom toga, potpisivanjem Granskog kolektivnog ugovora sa Vladom Kantona Sarajevo koristi bi imali svi uposlenici u zdravstvu u Kantonu Sarajevo, a u skladu sa odredbama Zakona o radu Federacije BiH.

Nadalje, pregovore o potpisivanju novog Granskog kolektivnog ugovora smo inicirali u augustu 2018. godine sa tadašnjom Vladom Kantona Sarajevo. U oktobru iste godine su održani izbori, te smo do 26.12.2018. godine morali čekati formiranje nove Vlade Kantona Sarajevo. Potom je sadašnja Vlada Kantona Sarajevo potrošila mjesec dana u formiranju svog pregovaračkog tima, tako da tek u februaru 2019. godine ponovo krećemo sa pregovorima u vezi novog Granskog kolektivnog ugovora, a gdje nam je odmah rečeno da nema novca za naše zahtjeve. Pregovori između pregovaračkih timova Sindikata radnika u zdravstvu u Kantonu Sarajevo i Vlade Kantona Sarajevo su trajali u periodu od 01.02.2019. do 08.05.2019. godine, a tokom tih pregovora, Pregovarački tim Vlade Kantona Sarajevo nije dao nikakvu ponudu u vezi novog Granskog kolektivnog ugovora. Nakon neuspjelih pregovora, a s ciljem postizanja kompromisnog rješenja i bez provođenja štrajka, krećemo sa provođenjem postupka mirenja u skladu sa odredbama Zakona o radu Federacije BiH, a zatim i prema odredbama Zakona o štrajku Federacije BiH. Oba mirenja su okončana bezuspješno, tako da je Sindikatu ostalo zadnje sredstvo sindikalne borbe, a to je štrajk.

Kada je Pregovaračkom timu Vlade Kantona Sarajevo argumentovano da je rebalansom finansijsa Zavoda zdravstvenog osiguranja Kantona Sarajevo ostavljen novac za zahtjeve Sindikata, tada se pojavljuje novi izgovor u smislu da će biti izmjene Zakona o doprinosima i Zakona o porezu na dohodak koje će za posljedicu imati manje novca, odnosno manji priliv prihoda u kasi Zavoda zdravstvenog osiguranja Kantona Sarajevo. Kada smo i taj "argument" pobili, pojavljuje se prijedlog da se medicinarima "nešto da", nemedicinarima ništa, a o doktorima se ne smije ni misliti, čime su pokušavali da nas uvuku u novu diskriminaciju, što smo odmah odbili.

Trenutna situacija poslije 80 dana štrajka je sljedeća:

U slučaju da potpišemo naš važeći kolektivni ugovor, dakle kolektivni ugovor koji je potpisao ovaj sindikat 2017. i 2018. godine, koeficijent specijaliste pada sa sadašnjih 5,30 na 4,50. Vlada Kantona Sarajevo nema zakonskog uporišta da doneše odluku kojom bi ostavila sadašnji specijalistički koeficijent od 5,30, čime nastaje veliki problem. Nadalje, na osnovu presude Kantonalnog suda u Sarajevu iz februara ove godine i rješenja istog suda iz septembra tekuće



godine u vezi postupka o diskriminaciji, otvara se prostor za tužbe na ime potraživanja materijalne nadoknade po osnovu diskriminacije oko 6.000 "nedoktora" prema Vladi Kantona Sarajevo čime će se dramatično urušiti budžet Kantona Sarajevo.

Našim prijedlogom Granskog kolektivnog ugovora i usklađivanjem koeficijenata otklonila bi se počinjena diskriminacija, kao i opasnost od oko 6.000 tužbi "nedoktora" za materijalnu nadoknadu prema Vladi Kantona Sarajevo, budžetu Kantona Sarajevo ne bi prijetila opasnost od urušavanja, a Vlada Kantona Sarajevo bi dobila godinu dana za provođenje reformi u zdravstvu Kantona Sarajevo koje je dobrano urušeno. I najbitnije u svemu ovome jeste da bi se odmah nastavilo raditi u punom kapacitetu, a Ministarstvo zdravstva Kantona Sarajevo bi se moglo konačno posvetiti izradi normativa rada, platnih razreda koje već imaju zemlje u okruženju, kao i izradi unificiranog pravilnika o radnom vremenu za teritoriju Kantona Sarajevo, te narednu godinu provesti u ozbiljnim reformama zdravstva Kantona Sarajevo.



Sindikat radnika u zdravstvu u Kantonu Sarajevo